



REPUBLIKA E SHQIPËRISË

KOMISIONI I PAVARUR I KUALIFIKIMIT

Nr. 682 Akti

Nr. 712 Vendimi

Tiranë, më 7.11.2023

V E N D I M

Trupi gjykues i Komisionit të Pavarur të Kualifikimit, i përbërë nga:

**Alma Faskaj** Kryesuese

**Xhensila Pine** Relatore

**Pamela Qirko** Anëtare

në prani të vëzhguesit ndërkombëtar, z. Theo Jacobs, asistuar gjatë procesit të vendimmarrjes nga sekretarja gjyqësore, znj. Elda Faruku, mori në shqyrtim, mbi bazë dokumentesh, çështjen që i përket subjektit të rivlerësimit:

**SUBJEKTI I RIVLERËSIMIT:** **Z. Bledar Mustafaraj**, me detyrë prokuror në Prokurorinë pranë Gjykatës së Shkallës së Parë të Juridiksionit të Përgjithshëm Elbasan.

**BAZA LIGJORE:** **Neni 179/b** i Kushtetutës së Republikës së Shqipërisë;  
**Neni G** i Aneksit të Kushtetutës së Republikës së Shqipërisë;  
**Ligji nr. 84/2016**, “Për rivlerësimin kalimtar të gjyqtarëve dhe prokurorëve në Republikën e Shqipërisë”;  
**Ligji nr. 96/2016**, “Për statusin e gjyqtarëve dhe prokurorëve në Republikën e Shqipërisë”;  
**Ligji nr. 44/2015**, “Kodi i Procedurave Administrative i Republikës së Shqipërisë”;  
**Vendimi nr. 78, datë 12.12.2017**, i Gjykatës Kushtetuese.

**I. RRETHANAT E ÇËSHTJES**

1. Subjekti i rivlerësimit, z. Bledar Mustafaraj, gjatë periudhës së rivlerësimit kalimtar ka ushtruar detyrën e prokurorit pranë Gjykatës së Rrethit Gjyqësor Elbasan. Në zbatim të pikës 3 të nenit 179/b të Kushtetutës, ky subjekt i është nënshtruar procesit të rivlerësimit *ex officio*.
2. Subjekti i rivlerësimit, z. Bledar Mustafaraj, është shortuar në shortin e datës 15.12.2020, në përputhje me rregulloren e zhvillimit të shortit në Komisionin e Pavarur të Kualifikimit (në vijim Komisioni). Nga procedura e shortit rezultoi se procesi i rivlerësimit do të kryhet nga

trupi gjykues i përbërë nga komisionerët Alma Faskaj, Pamela Qirko dhe Xhensila Pine, raportore e çështjes.

**3.** Menjëherë pas hedhjes së shortit, bazuar në nenet 33, 39 dhe 43 të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”, u administrua raporti i hartuar nga Inspektorati i Lartë i Deklarimit dhe Kontrollit të Pasurive dhe Konfliktit të Interesave.

**4.** Trupi gjykues i shortuar vendosi fillimin e hetimit administrativ të thelluar dhe të gjithanshëm sipas nenit 45 të ligjit nr. 84/2016, me qëllim vlerësimin e të gjitha fakteve dhe rrethanave të nevojshme për procedurën e rivlerësimit, si dhe të caktojë kryesuese të trupit gjykues komisioneren Alma Faskaj. Të gjithë anëtarët deklaruan mosqenien në kushtet e konfliktit të interesit.

**5.** Komisioni, nëpërmjet postës elektronike, njoftoi subjektin e rivlerësimit mbi fillimin e procesit të rivlerësimit kalimtar dhe përbërjen e trupit gjykues. Subjekti i rivlerësimit nuk ka shprehur konflikt interesi me anëtarët e trupit gjykues.

**6.** Trupi gjykues, në prani edhe të vëzhguesit ndërkombëtar, me vendimin datë 9.9.2023 vendosi të mbyllë hetimin kryesisht për subjektin e rivlerësimit Bledar Mustafaraj për të tria kriteret e rivlerësimit. Subjekti u njoftua në rrugë elektronike për rezultatet e hetimit dhe afatin për kthimin e përgjigjeve dhe depozitimin e provave brenda datës 26.9.2023. Trupi gjykues, me vendimin nr. 3, datë 25.9.2023, vendosi të pranojë kërkesën e subjektit të rivlerësimit për shtyrjen e afati të shpjegimeve për rezultatin e hetimit administrativ nga data 26.9.2023 deri më 10.10.2023.

**7.** Subjekti i rivlerësimit ka paraqitur provat e shpjegimet e tij në përgjigje të barrës së provës, të cilat janë administruar nga trupi gjykues, si dhe ka njoftuar trupin gjykues se në datën 5.10.2023 ka depozituar pranë Këshillit të Lartë të Prokurorisë kërkesën për mbarimin e statusit të magjistratit.

**8.** Me vendimin nr. \*\*\*, datë 20.10.2023, KLP-ja ka vendosur: *Deklarimin e mbarimit të statusit të magjistratit për shkak dorëheqjeje për z. Bledar Mustafaraj, me detyrë prokuror në Prokurorinë pranë Gjykatës së Shkallës së Parë të Juridiksionit të Përgjithshëm Elbasan.*

**9.** Komisioni, pasi ka administruar vendimin nr. \*\*\*, datë 20.10.2023, me anë të postës elektronike datë 3.11.2023 i ka kërkuar subjektit të shprehet nëse e ka ankimuar këtë vendim, si dhe bazuar në nenin 55 të ligjit nr. 84/2016 i ka kërkuar të shprehet nëse dëshiron të marrë pjesë në seancën dëgjimore lidhur me përfundimin e procesit të rivlerësimit të tij në zbatim të nenit G, paragrafët 1 dhe 2 të Aneksit të Kushtetutës.

**10.** Subjekti i rivlerësimit, me anë të postës elektronike datë 6.11.2023, ka njoftuar Komisionin se nuk ka ushtruar ankim ndaj vendimit të Këshillit të Lartë të Prokurorisë që ka disponuar për mbarimin e statusit të magjistratit, sipas kërkesës së paraqitur prej tij dhe nuk dëshiron të marrë pjesë në seancë dëgjimore.

**10.1** Komisioni, pasi ka administruar vendimin nr. \*\*\*, datë 20.10.2023, të KLP-së, me anë të postës elektronike ka marrë konfirmimin e mosankimit të këtij vendimi edhe nga Gjykata Administrative e Apelit.

## **II. ARSYET PËR PËRFUNDIMIN E PROCESIT TË RIVLERËSIMIT**

**11.** Procesi i rivlerësimit ndaj subjektit Bledar Mustafaraj ka filluar në respektim të pikës 3 të nenit 179/b të Kushtetutës së Republikës së Shqipërisë dhe të pikës 4 të nenit 4 të ligjit nr.

84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”.

**12.** Trupi gjykues i Komisionit të Pavarur të Kualifikimit, pasi u njoh me rrethanat e çështjes, bazuar në provat e administruara më lart, konstaton se:

- i) Subjekti i rivlerësimit ka ushtruar funksionin e prokurorit në Prokurorinë pranë Gjykatës së Shkallës së Parë të Juridiksionit të Përgjithshëm Elbasan.
- ii) Subjekti i rivlerësimit Bledar Mustafaraj ka ushtruar të drejtën për të dhënë dorëheqjen nga statusi i magjistratit gjatë procesit të rivlerësimit.
- iii) Këshilli i Lartë i Prokurorisë, me vendimin nr. \*\*\*, datë 20.10.2023, ka vendosur deklarinimin e mbarimit të statusit të magjistratit Bledar Mustafaraj për shkak të dorëheqjes se tij nga statusi i magjistratit.
- iv) Neni 65 i ligjit nr. 96/2016, “Për statusin e gjyqtarëve dhe prokurorëve në Republikën e Shqipërisë”, ka parashikuar procedurën për mbarimin e statusit të magjistratit nëpërmjet dorëheqjes.

**13.** Neni G i Aneksit të Kushtetutës së Republikës së Shqipërisë ka parashikuar mundësinë e subjektit të rivlerësimit për të dhënë dorëheqjen, si vijon: *“1. Subjekti i rivlerësimit mund të japë dorëheqjen nga detyra dhe në këtë rast procesi i rivlerësimit ndërpritet. 2. Subjekti i rivlerësimit që dorëhiqet sipas kësaj dispozite, nuk mund të emërohet gjyqtar ose prokuror i çdo niveli, anëtar i Këshillit të Lartë Gjyqësor ose i Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm, për një periudhë 15-vjeçare”.*

**14.** Vendimi nr. 78, datë 12.12.2017, i Gjykatës Kushtetuese, paragrafi 43, shprehet: *“[...] Gjykata thekson se për sa kohë që subjekti i rivlerësimit është në detyrë dhe procesi i rivlerësimit nuk ka përfunduar ende, ai ka të drejtën të japë dorëheqjen dhe në këtë rast procesi i rivlerësimit ndërpritet, duke u zbatuar parashikimet e nenit G të Aneksit të Kushtetutës [...]”.*

**15.** Subjekti i rivlerësimit, më 6.11.2023, me anë të postës elektronike, ka njoftuar Komisionin se heq dorë nga e drejta për të marrë pjesë në seancën dëgjimore.

**16.** Trupi gjykues çmon se subjekti i rivlerësimit ka shfrytëzuar të drejtën që i njeht Kushtetuta dhe ligji për dorëheqje nga statusi i magjistratit. Ndërprerja e procesit të rivlerësimit për shkak të dorëheqjes së subjektit të rivlerësimit sjell si pasojë përfundimin e kësaj procedure administrative dhe, si rrjedhojë, subjekti i rivlerësimit humbet të drejtën për t’u emëruar gjyqtar ose prokuror i çdo niveli, anëtar i Këshillit të Lartë Gjyqësor ose i Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm, për një periudhë 15-vjeçare, sipas parashikimeve të pikës 2 të nenit G të Aneksit të Kushtetutës.

### **PËR KËTO ARSYE,**

Trupi gjykues i Komisionit të Pavarur të Kualifikimit, mbështetur në nenin G të Aneksit të Kushtetutës së Republikës së Shqipërisë, nenin 56 të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”, si dhe në nenin 65 të ligjit nr. 96/2016, “Për statusin e gjyqtarëve dhe prokurorëve në Republikën e Shqipërisë”,

### **V E N D O S I:**

1. Të deklarojë ndërprerjen e procesit të rivlerësimit kalimtar për subjektin e rivlerësimit, z. Bledar Mustafaraj.

2. Ndalimin e emërimit të z. Bledar Mustafaraj si gjyqtar ose prokuror i çdo niveli, anëtar i Këshillit të Lartë Gjyqësor ose Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm, për një periudhë 15-vjeçare.
  3. Ky vendim u njoftohet subjektit të rivlerësimit, Komisionerit Publik dhe vëzhguesit ndërkombëtar dhe publikohet në faqen zyrtare të Komisionit, në përputhje me pikën 7 të nenit 55 të ligjit nr. 84/2016.
  4. Kundër këtij vendimi lejohet ankim në Kolegjin e Posaçëm të Apelit brenda 15 ditëve nga data e njoftimit të tij.
  5. Ankimi dorëzohet në Komisionin e Pavarur të Kualifikimit.
- Ky vendim u shpall në datën 7.11.2023.

## **ANËTARËT E TRUPIT GJYKUES**

**Alma FASKAJ**  
**Kryesuese**

**Xhensila PINE**  
**Relatore**

**Pamela QIRKO**  
**Anëtare**

*Sekretare gjyqësore*  
*Elda Faruku*